

[Augsburg], 15. März 1563

An Johannes Oporinus

UB Basel, Fr. Gr. I 11, fol. 258r.
Steinmann Nr. 750.

S. P. D. Quanta me laetitia missae abs te Epicteti chartae et charactere eleganti et charta egregia excusae delectent, ex eo colligere potes, quod nihil vñquam aequè aegrè tuli ac spei huius tam diuturnam frustrationem. Veniam autem peto abs te ineptiarum mearum, non ignaro quam morosi et suspitiosi sint amantes.

Exempla mitti mihi velim 60, si tibi graue non est. Nulla mihi supererunt. Nam quib[us] Enchiridion donau (donaui autem plurimis) ijdem opus a me integrum expectant. Sed nihil tibi oneris impono. Malo ipse sumptus facere (quod et in Enchiridio factum) quam tibi esse grauis, modò liber a Bibliopolis nostratibus huc afferatur.

Commentarios in Officia Ciceronis ab Erhardo Hillero accipies, in quibus excudendis eum te praebebis, ne me benevolentiae erga te meae paeniteat. Vti sum coactus plurium opera in describendo, et inter relegendum varia inserui emblemata, quae abs te legi posse non diffido, assueto scilicet τῇ κακογραφίᾳ μου, καὶ τὴν φύσιν ὅντι στοχαστικωτάτῳ. De praefationibus nuper te monui, vt eas absoluto demum opere excuderes, διὰ τὰς ὑπούλους τῶν προσφωνούμενων διανοίας, vt si quid interea inter os et offam, res mihi esset integra. etsi parum sanè curo, quicquid acciderit. Tribuatur hoc a me officij vel ingratis, et malignis ingenij et laborum meorum aestimatoribus, quod absque ijs si fuisse, nunquam manum ad huiusmodi opus scribendum admouisse. Quare non me offendes, etiamsi primas illas impresseris. De forma et charactere nihil tibi praescribo. Neque etiam tempus praefinio. Sed si tibi visum fuerit ad Cal[endas] Septembbris editionem moliri, satis maturè fortasse tibi mittam commentariolos in Catonem maiorem, qui paginas vt opinor 30 non excedent.

Possent etiam commentarioli mei de sectis philosophorum adiungi. Sed hos inemendatos Schenckio petenti dedi, et correctionis ac locupletationis laborem veritus, non repetij. Et quid his opus? Cum ipsis in officijs plus satis insit offuciarum. Nunc boni ominis causa et grati animi exiguum σημεῖον mitto 2. coronatos, et Mercurium tibi precor propicium. Vale. Idibus Martij intempesta nocte. 1563.

Hiero[nymus] W[olfius] T[uus].